




Jamiyah, universiti di Mesir tawar kursus bahasa Arab

MEMORANDUM

PERSETUJUAN: (Dari

kiri) Dr Hussin Mutalib,
Pengarah, Pusat
Pendidikan Jamiyah;
Profesor (Adjung) Dr
Mohd Hasbi Abu Bakar,
Presiden Jamiyah
Singapura; Profesor
Maged El-Kemary,
Rektor dan Presiden
Universiti Kafrelsheikh;
dan Cik Samia Elsokary,
Penyelaras Perhubungan
Antarabangsa Universiti
Kafrelsheikh; hadir dalam
acara menandatangani
perjanjian antara Jamiyah
Singapura dengan
Universiti Kafrelsheikh di
Mesir pada Isnin lalu. –
Foto JAMIYAH



JAMIYAH Singapura akan menawarkan kursus bahasa Arab tahun ini setelah menandatangani satu memorandum persetujuan (MOA) dengan Universiti Kafrelsheikh di Mesir baru-baru ini.

Di bawah perjanjian itu, universiti tersebut akan mengendalikan kursus bahasa Arab di Pusat Pendidikan Jamiyah.

Kursus tiga bulan itu akan merangkumi tiga komponen – perbualan dalam bahasa Arab, penulisan dalam bahasa Arab (bahasa Arab standard moden) dan terjemahan bahasa Arab-bahasa Inggeris.

Mereka yang tamat menjalani kursus itu akan menerima sijil daripada Universiti Kafrelsheikh, yang diiktiraf dan diterima di semua universiti di Mesir.

Perincian tentang tarikh dan pendaftaran bagi kursus tersebut akan diberitahu kemudian, kata Jamiyah.

Kursus bahasa Arab itu ditawarkan setelah bengkel bahasa Arab yang mengendalikan pensyarah Universiti Kafrelsheikh dan dianjurkan Pusat Pendidikan Jamiyah dan dianjurkan Pusat Pendidikan Jamiyah tahun lalu mendapat sambutan yang memberangsangkan, dengan lebih 400 orang menyertai bengkel itu.

Dengan respons yang baik itu, Presiden Jamiyah Singapura, Profesor (Adjung) Dr Mohd Hasbi Abu Bakar, dan Rektor dan Presiden Universiti Kafrelsheikh, Profesor Maged El-Kemary, telah menandatangani satu MOA bagi merasmikan kerjasama tersebut.

“Hari ini kami telah menandatangani bagi merasmikan kerjasama dengan Universiti Kafrelsheikh.

“Sebagai permulaan, kami akan menawarkan program Bahasa Arab ini

dan akan mempertimbangkan program lain yang berguna serta bermakna untuk dibawa ke Singapura,” kata Dr Hasbi.

Salah seorang peserta bengkel bahasa Arab yang diadakan tahun lalu, Cik Huziah Mohd Yusof, berkata beliau amat berpuas hati apabila mengetahui tentang kursus yang akan dianjurkan.

“Saya sangat tertarik dengan kandungan dan cara ia diajar dalam bengkel tahun lalu. Ia interaktif dan memberi penekanan kepada perbualan dan pemahaman, beserta dengan perlakuan bagi menyokong pemahaman.

“Saya teruja mahu menyertai kursus tiga bulan itu sekiranya jadual mengizinkan dan sangat-sangat menggalakkan ahli keluarga dan rakan-rakan agar turut serta,” katanya, yang bekerja dalam sektor pembinaan.